

仲景傷寒補亡論

仲景傷寒補亡論卷第六

河南郭雍撰

陽明經證治八十七條 少陽經證治十一條

陽明經證治八十七條

仲景曰尺寸俱長者陽明受病也當二三日發以其脈俠鼻絡於目故身熱目疼鼻乾不得臥龐氏曰此證惡寒可發汗若惡寒罷反自汗惡熱者爲胃家實屬正陽陽明宜調胃承氣湯

仲景問曰病有太陽陽明有正陽陽明有少陽陽明

何謂也答曰太陽陽明者脾約是也正陽陽明者胃
家實是也少陽陽明者發汗利小便已胃中燥煩實
大便難是也龐氏曰本太陽病若發汗若下若利小
便此亡津液胃中乾燥因轉屬陽明名曰太陽陽明
也本傳到少陽因發汗利小便胃中燥大便難者名
曰少陽陽明也病人本風盛氣實津液消燥或始惡
寒汗出後惡寒旣罷而反發熱或始得病便發熱狂
言者名曰正陽陽明也凡陽明證俱宜下唯中寒惡
寒爲病在經與太陽合病屬表可發其汗

又曰陽明之爲病胃家實是也千金作胃中寒者非
又問曰何緣得陽明病答曰太陽病若發汗若下若
利小便此亡津液胃中乾燥因轉屬陽明不更衣內
實大便難者此名陽明也

又問曰陽明病外證云何答曰身熱汗自出不惡寒
反惡熱也

又問曰病有得之一日不發熱而惡寒者何也答曰
雖得之一日惡寒將自罷卽自汗出而惡熱也

又問曰惡寒何故自罷答曰陽明居中土也萬物所

歸無所復傳始雖惡寒二日自止此爲陽明病也

又曰本太陽初得病時發其汗汗先出不徹因轉屬陽明也

又曰傷寒發熱無汗嘔不能食而反汗出漉漉然者是轉屬陽明也

又曰傷寒三日陽明脈大

又曰傷寒脈浮而緩手足自溫者是爲繫在太陰太陰者身當發黃若小便自利者不能發黃至七八日大便鞭者爲陽明病也

又曰傷寒轉繫陽明者其人濇然微汗出也

又曰陽明中風口苦咽乾腹滿微喘發熱惡寒脈浮而緊若下之則腹滿小便難也常氏云可桂枝麻黃各半湯小柴胡湯

又曰陽明病若能食名中風不能食名中寒

又曰陽明病若中寒者不能食小便不利手足濇然汗出此欲作固瘕必大便初鞭後溏所以然者以胃中冷水穀不別故也常氏云可理中湯豬苓湯
又曰陽明病初欲食小便反不利大便自調其人骨

節疼翕翕如有熱狀奄然發狂濺然汗出而解者此
水不勝穀氣與汗共并脈緊則愈常氏云疑闕麻黃
湯一法又一本云脈去則愈雍曰千金翼作堅者則
愈無脈字證既有誤未可使用麻黃湯也若脈浮而
緊無汗者則可用三書之誤是誤以緊爲堅者爲去
或漏脈字或漏者字當云脈緊者則愈

又曰陽明病欲解時從申至戌上

又曰陽明病不能食攻其熱必噦所以然者胃中虛
冷故也以其人本虛故攻其熱必噦常云可溫中湯

金匱方小半夏湯亦可

又曰陽明病脈遲食難用飽飽則微煩頭眩必小便難此欲作穀瘴雖下之腹滿如故所以然者脈遲故也常氏云茯苓湯五苓散雍曰已發黃者茵陳蒿湯又曰陽明病法多汗反無汗其身如蟲行皮中狀者此以久虛故也常氏云可桂枝加黃耆湯雍曰以無汗故如蟲行皮中狀須小汗乃解宜桂枝麻黃各半湯此湯解身痒能小汗故也

又曰陽明病反無汗而小便利二三日嘔而欬手足

厥者必苦頭痛若不欬不嘔手足不厥者頭不痛常氏云類要用小建中湯誤也可小柴胡湯雍曰手足厥者宜小建中湯

又曰陽明病但頭眩不惡寒故能食而欬其人必咽痛若不欬者咽不痛常氏云可服茯苓甘草白朮生薑湯

方未見

咽痛者宜桔梗湯

又口陽明病無汗小便不利心中懊憹者身必發黃常氏云可茵陳蒿湯調五苓散

又曰陽明病被火額上微汗出而小便不利者必發

黃常氏云可與茵陳蒿湯調五苓散

又曰陽明病脈浮而緊者必潮熱發作有時但浮者必盜汗出常氏云可與柴胡桂枝湯

又曰陽明病口燥但欲漱水不欲嚥者此必衄常氏

云可黃芩芍藥地黃湯

當作黃芩芍藥甘草湯
此句後增非郭氏語

又曰陽明病本自汗出醫更重發汗病已差尙微煩不了了者此大便必鞭故也以亡津液胃中乾燥故令大便鞭當問其小便日幾行若本小便日三四行今日再行故知大便不久出今爲小便數少以津液

當還入胃中故知不久必大便也

又曰傷寒嘔多雖有陽明證不可攻之常云可小柴胡湯

又曰陽明病心下鞭滿者不可攻之攻之利遂不止者死利止者愈常氏云未攻者可與生薑瀉心湯利不止者四逆湯

又曰陽明病面合赤色不可攻之必發熱色黃小便不利也常氏云可五苓散雍曰旣不可攻則調胃承氣不可用但煎茵陳蒿湯調五苓散服之

又曰陽明病不吐不下心煩者可與調胃承氣湯

又曰陽明病脈遲雖汗出不惡寒者其身必重短氣
腹滿而喘有潮熱者此外欲解可攻裏也手足濇然
汗出者此大便已鞭也大承氣湯主之若汗多微發
熱惡寒者外未解也其熱不潮未可與承氣湯若腹
大滿不通者可與小承氣湯微和胃氣勿令大泄下
又曰陽明病潮熱大便微鞭者可與大承氣湯不鞭
者不可與之若不大便六七日恐有燥屎欲知之法
少與小承氣湯湯入腹中轉失氣者此有燥屎也乃

可攻之若不轉失氣者此但初頭鞭後必澹不可攻之攻之必脹滿不能食也欲飲水者與水則噦其後發熱者必大便復鞭而少也以小承氣湯和之不轉失氣者慎不可攻也

又曰夫實則讖語虛則鄭聲鄭聲者重語也直視讖語喘滿者死下利者亦死

又曰發汗多若重發汗者亡其陽讖語脈短者死脈自和者不死

又曰傷寒若吐若下後不解不大便五六日上至十

餘日日晡所發潮熱不惡寒獨語如見鬼狀若劇者發則不識人循衣摸床惕而不安微喘直視脈弦者生濇者死微者但發熱譫語者大承氣湯主之若一服利止後服

又曰陽明病其人多汗以津液外出胃中燥大便必鞭鞭則譫語小承氣湯主之若一服譫語止者更莫復服

又曰陽明病譫語發潮熱脈滑而疾者小承氣湯主之因與承氣湯一升腹中轉失氣者更服一升若不

轉失氣者勿更與之明日又不大便脈反微瀼者裏虛也爲難治不可更與承氣湯也常氏云可用黃耆人參建中湯

又曰陽明病譫語有潮熱反不能食者胃中必有燥屎五六枚也若能食者但鞭耳宜大承氣湯下之

又曰陽明病下血譫語者此爲熱入血室但頭汗出者刺期門隨其實而瀉之漑然汗出則愈雍曰此是婦人證

又曰汗出譫語者以有燥屎在胃中此爲風也須下

之過經乃可下之下之若早語言必亂以表虛裏實故也下之則愈宜大承氣湯

又曰傷寒四五日脈沈而喘滿沈爲在裏而反發其汗津液越出大便爲難表虛裏實久則譫語常氏云喘滿無大熱者可麻黃杏仁甘草石膏湯裏實譫語者調胃承氣湯

又曰三陽合病腹滿身重難以轉側口不仁面垢譫語遺尿發汗則譫語下之則額上生汗手足逆冷若自汗出者白虎湯主之

龐氏在少陽證

又曰二陽併病太陽證罷但發潮熱手足絳絳汗出大便難而譫語者下之則愈宜大承氣湯

又曰陽明病脈浮而緊咽燥口苦腹滿而喘發熱汗出不惡寒反惡熱身重若發汗則躁心憤憤反譫語若加燒鍼必怵惕煩躁不得眠若下之則胃中空虛客氣動膈心中懊懣舌上胎者梔子豉湯主之

龐氏云脈

浮緊當無汗反有汗咽燥腹滿惡熱法當下之而反脈浮緊不可下此恐變風濕宜細詳之

又曰若渴欲飲水口乾舌燥者白虎加人參湯主之
又曰若脈浮發熱渴欲飲水小便不利者猪苓湯主

之

又曰陽明病汗出多而渴者不可與猪苓湯以汗多胃中燥猪苓湯復利其小便故也常氏云可與白虎加入參湯雍曰宜柴胡桂枝湯和榮衛通津液也

又曰脈浮而遲表熱裏寒下利清穀者四逆湯主之又曰若胃中虛冷不能食者飲水則噦常氏云可溫

中湯

金匱方二物

又曰脈浮發熱口乾鼻燥能食者則衄常氏云可黃

芩湯

又曰陽明病下之其外有熱手足溫不結胸心中懊
懷飢不能食但頭汗出者梔子豉湯主之

又曰陽明病發潮熱大便溏小便自可胸脇滿不去
者與小柴胡湯主之

又曰陽明病脇下鞭滿不大便而嘔舌上白胎者可
與小柴胡湯上焦得通津液得下胃氣因和身濺然
而汗出解也

又曰陽明中風脈弦浮大而短氣腹都滿脇下及心
痛久按之氣不通鼻乾不得汗嗜臥一身及面目悉

黃小便難有潮熱時時噦耳前後腫刺之小差外不解病過十日脈續浮者與小柴胡湯

又曰脈但浮無餘證者與麻黃湯若不尿腹滿加噦者不治雍曰千金通續前證爲一證似當理

又曰陽明病自汗出若發汗小便自利者此爲津液內竭雖鞭不可攻之當須自欲大便宜蜜煎導而通之若土瓜根及大猪膽汁皆可爲導

又曰陽明病脈遲汗出多微惡寒者表未解也可發汗宜桂枝湯

又曰陽明病脈浮無汗而喘者發汗則愈宜麻黃湯
又曰陽明病發熱汗出此爲熱越不能發黃也但頭
汗出身無汗劑頸而還小便不利渴飲水漿者此爲
瘀熱在裏身必發黃茵陳蒿湯主之

又曰陽明證其人喜忘者必有畜血所以然者本有
久瘀血故令喜忘屎雖鞭大便反易其色必黑宜抵
當湯下之

又曰陽明病下之心中懊懣而煩胃中有燥屎者可
攻腹微滿初頭顛後必澹不可攻之若有燥屎者宜

大承氣湯

又曰病人不大便五六日繞臍痛煩躁發作有時者此有燥屎故使不大便也常氏云可小承氣湯
又曰病人煩熱汗出則解又如瘧狀日晡所發熱者屬陽明也脈實者宜下之脈浮虛者宜發汗下之與大承氣湯發汗宜桂枝湯

又曰大下後六七日不大便煩不解腹滿痛者此有燥屎也所以然者本有宿食故也宜大承氣湯

又曰病人小便不利大便乍難乍易時有微熱喘冒

不能臥者有燥屎也宜大承氣湯

又曰食穀欲嘔者屬陽明也吳茱萸湯主之得湯反

劇者屬上焦也常氏云可橘皮湯

類要云橘皮一兩甘草一兩生薑四

兩人參三兩爲末水煎服

又曰太陽病寸緩關浮尺弱其人發熱汗出復惡寒不嘔但心下痞者此以醫下之也如其不下者病人不惡寒而渴者此轉屬陽明也小便數者六便必鞭不更衣十日無所苦也渴欲飲水者少少與之但以法救之渴者宜五苓散

又曰陽脈微而汗出少者爲自和也汗出多者爲太過陽脈實因發其汗出多者亦爲太過太過爲陽絕於裏亡津液大便因鞭也常氏云可與小柴胡湯和其津液如便益堅可調胃承氣湯雍曰通津液用柴胡桂枝湯尤穩如不得已至用承氣湯防下後變作狐惑宜小小通之

又曰脈浮而芤浮爲陽芤爲陰浮芤相搏胃氣生熱其陽則絕常氏云可柴胡湯

又曰跌陽脈浮而濇浮則胃氣強濇則小便數浮濇

相搏大便則鞭其脾爲約麻仁丸主之

又曰太陽病三日發汗不解蒸蒸發熱者屬胃也調胃承氣湯主之

又曰傷寒吐後腹脹滿者與調胃承氣湯

又曰太陽病若吐若下若發汗後微煩小便數大便因鞭者與小承氣湯和之愈

又曰得病二三日脈弱無太陽柴胡證煩躁心下鞭至四五日雖能食以小承氣湯少少與微和之令小安至六日與承氣湯一升若不大便六七日小便少

者雖不能食但初頭鞭後必漉未定成鞭攻之必漉
須小便利尿定鞭乃可攻之宜大承氣湯

又曰傷寒六七日

千金作七八日

目中不了了睛不和無表

裏證大便難身微熱者此爲實也急下之宜大承氣

湯

又曰陽明病發熱汗多者急下之宜大承氣湯

一云大柴

胡湯

又曰發汗不解腹滿痛者急下之宜大承氣湯

又曰腹滿不減減不足言當下之宜大承氣湯

又曰陽明少陽合病必下利其脈不負者順也負者失也互相剋賊名爲負也

又曰脈滑而數者有宿食也當下之宜大承氣湯雍曰此本文與前證相連恐是合病脈滑數者更詳之又曰病人無表裏證發熱七八日雖脈浮數者可下之假令已下脈數不解合熱則消穀善飢至六七日不大便者有瘀血也宜抵當湯

又曰若脈數不解而下不止必協熱而便膿血也常氏云可白頭翁湯千金方通前證合爲一證

又曰傷寒發汗已身目爲黃所以然者以寒濕在裏不解故也以爲不可下也於寒濕中求之常氏云可五苓散

又曰傷寒七八日身黃如橘子色小便不利腹微滿者茵陳蒿湯主之

又曰傷寒身黃發熱梔子蘘皮湯主之

又曰傷寒瘀熱在裏身必發黃麻黃連軀赤小豆湯主之

少陽經證治十一條

仲景曰脈尺寸俱弦者少陽受病也當三四日發其脈循脇絡於耳故胸脇痛而耳聾三陽皆受病未入於府者可汗而已

又曰少陽之爲病口苦咽乾目眩也

又曰少陽中風兩耳無所聞目赤胸中滿而煩者不可吐下吐下則悸而驚龐氏云可小柴胡湯常氏云吐下驚而悸者可桂枝去芍藥加龍骨牡蠣湯雍曰此證當服柴胡加龍骨牡蠣湯用桂枝非也

又曰傷寒脈弦細頭痛發熱者屬少陽少陽不可發

汗發汗則讖語此屬胃胃和則愈胃不和則煩而悸

一作躁

龐氏云多少陽者宜調胃承氣湯此屬少陽陽

明證少陽宜和表鮮有汗證仲景少陽和表宜小柴胡湯

又曰本太陽病不解轉入少陽脇下鞭滿乾嘔不能食往來寒熱尙未吐下脈沈緊者與小柴胡湯龐氏云脈緊者與小柴胡加牡蠣湯

又曰若已吐下發汗溫鍼讖語柴胡湯諸罷此爲壞病知犯何逆以法治之龐氏曰犯何逆犯四溫病壞

病也。雍曰：千金方通前合爲一證，則小柴胡首尾備見，爲當溫鍼讖語，亦宜桂枝甘草龍骨牡蠣湯。

又曰：三陽合病，脈浮大，上關，上但欲眠，睡目合則汗常氏云：可柴胡桂枝湯。龐氏云：不言弦者，隱於長大也。

又曰：傷寒六七日，無大熱，其人躁煩者，此爲陽去入陰故也。常氏云：可八石散茯苓湯。龐氏云：四五日或七八日。

又云：傷寒三日，三陽爲盡，三陰當受邪，其人反能食。

而不嘔此爲三陰不受邪也龐氏云病到陰必吐利也

又曰傷寒三日少陽脈小者欲已也龐氏云謂小而平勻也

又曰少陽病欲解時從寅至辰上

仲景傷寒補亡論卷第六終

仲景傷寒補亡論卷第七

河 南 郭 雍 譔 次

太陰經證治十條

少陰經證治四十七條

厥陰經證治六十三條

太陰經證治十條

仲景曰脈尺寸俱沈細者太陰受病也當四五日發
以其脈布胃中絡於噎故腹滿而噎乾龐氏云宜大
承氣湯下之雍謂更當詳證而後可下此卽仲景辨
太陰之說也未可遽下

又曰太陰之爲病腹滿而吐食不下自利益甚時腹自痛若下之必胸下結鞭雍曰若太陰本證藏寒自利不渴當依仲景溫之以四逆輩若本太陽病因誤下腹痛轉屬太陰者依仲景用桂枝加芍藥湯以太陽誤下表證未解也

又曰太陰中風四肢煩疼陽微陰濇而長者爲欲愈
又曰太陰病欲解時從亥至丑上

又曰太陰病脈浮者可發汗宜桂枝湯

又曰自利不渴者屬太陰以其藏有寒故也當溫之

宜服四逆輩

又曰傷寒三日太陽脈弱至四日太陰脈大龐氏云脈大而胸滿多痰者可吐之無此證者宜汗之雍曰吐用瓜蒂散汗用桂枝湯仍須脈浮則可汗也

又曰傷寒脈浮而緩

龐氏云亦大之類

手足自溫者繫在太

陰太陰當發身黃

龐氏云小便不利者必發黃以五苓散加茵陳主之

若小便

自利者不能發黃至七八日雖暴煩下利日十餘行必自止以脾家實腐穢當去故也龐氏云可類要四

味橘皮湯

又曰本太陽病醫反下之因而腹滿時痛者屬太陰也桂枝加芍藥湯主之大實痛者桂枝加大黃湯主之

又曰太陰爲病脈弱其人續自便利設當行大黃芍藥者宜減之以其人胃氣弱易動故也校正云下利者先煎芍藥二沸雍曰以脈弱故知胃氣弱也

少陰經證治四十七條

仲景曰脈尺寸俱沈者少陰受病也當五六日發以其脈貫腎絡於肺繫舌本故口燥舌乾而渴龐氏云

宜大承氣湯雍曰未可也更宜詳餘證可下則下之
又曰少陰之爲病脈微細但欲寐也

又曰少陰病欲吐不吐心煩但欲寐五六日自利而
渴者屬少陰也虛故引水自救若小便色白者少陰
病形悉具小便白者以下焦虛有寒不能制水故令
色白也常氏云可四逆湯甘草乾薑湯

金匱方

又曰病人脈陰陽俱緊反汗出者亡陽也此屬少陰
法當咽痛而復吐利常氏云可猪膚湯雍曰少陰有
伏氣病亦如傷寒法先咽痛次必下利與前證相似

古人謂之腎傷寒其病輕不傳經治法不可同咽痛則半夏桂枝甘草湯下利用四逆湯二三日卽愈

又曰少陰病欬而下利譏語者被火氣劫故也小便必難以強責少陰汗也常氏云桂枝去芍藥加蜀漆龍骨牡蠣救逆湯以救火逆猪苓湯五苓散以通小便

又曰少陰病脈細沈數病爲在裏不可發汗

又曰少陰病脈微不可發汗亡陽故也陽已虛尺脈弱濇者復不可下之雍曰可附子湯

又曰少陰病脈緊至七八日自下利脈暴微手足反溫脈緊反去者爲欲解也雖煩下利必自愈

又曰少陰病下利若利自止惡寒而踰臥手足溫者可治常氏云可當歸四逆湯

又曰少陰病惡寒而踰時自煩欲去衣被者可治常氏云吳茱萸湯雍曰凡少陰病煩躁者不可下先服吳茱萸湯以煩躁非實熱且手足多逆冷也

又曰少陰中風脈陽微陰浮者爲欲愈

又曰少陰病欲解時從子至寅上

又曰少陰病吐利手足不逆冷反發熱者不死脈不至者灸少陰七壯常氏云少陰太谿穴也龐氏云言發熱者謂其身發熱也太谿穴在內踝後跟骨上動脈陷中

又曰少陰病八九日一身手足盡熱者以熱在膀胱必便血也常氏云可桃仁承氣湯芍藥地黃湯

未見方

又曰少陰病但厥無汗而強發之必動其血未知從何道出或從口鼻或從目出是名下厥上竭爲難治常氏云可芍藥地黃湯雍曰仍灸太谿三陰交及湧

泉穴

又曰少陰病惡寒身踈而利手足逆冷者不治雍曰
灸太谿等穴仍服四逆湯

又曰少陰病吐利躁煩四逆者死龐氏云煩躁者內
煩躁也與吳茱萸湯正宜細審其生死也又曰凡少
陰四逆者宜溫之雍曰此正仲景吳茱萸湯證不當
不治仍灸太谿

又曰少陰病下利止而頭眩時時自冒者死龐氏云
此當是少陽冒昧汗濺然出脈勻小浮者少陰無眩

冒之證雍曰千金翼作少陰

又曰少陰病四逆惡寒而身蹇脈不至不煩而躁者

死千金翼同一作吐利而躁逆者死龐氏詳定云吐利煩躁者死雍

曰吐利煩躁四逆者死已見前證不應重出此正謂

不煩而躁屬利證也更宜吳茱萸湯當歸四逆加吳

茱萸湯仍灸太谿穴

又曰少陰病六七日息高者死

又曰少陰病脈微細沈但欲臥汗出不煩自欲吐至

五六日自利復煩躁不得臥寐者死

又曰少陰病始得之反發熱脈沈者麻黃附子細辛湯主之龐氏曰少陰病脈沈不知何沈也且沈緊發汗則動經沈數爲病在裏不可發汗此脈或沈而濡或沈而微是表中寒而裏不消脈應裏而發在表故以細辛之藥溫散而取汗也

又曰少陰病得之二三日麻黃附子甘草湯微發汗以二三日無裏證故微發汗也龐氏曰謂初得病二三日常見少陰證無陽者須發小汗也

又曰少陰病得之二三日以上心中煩不得臥黃連

阿膠湯主之

又曰少陰病得之一二日口中和其背惡寒者當灸之附子湯主之常氏云當灸膈俞關元穴背俞第三行雍曰此有漏字當是灸膈俞及關元穴也膈俞是背俞第二行穴

又曰少陰病身體痛手足寒骨節痛脈沈者附子湯主之

又曰少陰病下利便膿血者桃花湯主之

又曰少陰病二三日至四五日腹痛小便不利下利

不止便膿血者桃花湯主之

又曰少陰病下利便膿血者可刺常云刺幽門交信
雍曰宜灸

又曰少陰病吐利手足厥冷煩躁欲死者吳茱萸湯
主之雍曰凡少陰病四逆而煩躁者未問其餘證先
宜服吳茱萸湯四逆而無煩躁證者先宜服四逆湯
四逆下利脈不出者先宜服通脈四逆湯此三者治
少陰證大要藥也

又曰少陰病下利咽痛胸滿心煩者豬膚湯主之

又曰少陰病二三日咽痛者可與甘草湯不差者與桔梗湯龐氏云半夏散亦主之

又曰少陰病咽中痛半夏散及湯主之

又曰少陰病咽中傷生瘡不能語言聲不出者苦酒湯主之

又曰少陰病下利白通湯主之

又曰少陰病下利脈微者與白通湯利不止厥逆無脈乾嘔煩者白通加豬膽汁湯主之服湯脈暴出者死微續者生

又曰少陰病二三日不已至四五日腹痛小便不利四肢沈重疼痛自下利者此爲有水氣其人或欬或小便利或下利或嘔者眞武湯主之雍曰眞武湯不愈者小青龍湯

又曰少陰病下利清穀裏寒外熱手足厥逆脈微欲絕身反不惡寒其人面赤色或腹痛或乾嘔或咽痛或利止脈不出者通脈四逆湯主之

又曰少陰病四逆其人或欬或悸或小便利或腹中痛或泄利下重者四逆散主之

又曰少陰病下利六七日欬而嘔渴心煩不得眠者
猪苓湯主之

又曰少陰病得之二三日口燥咽乾者急下之宜大
承氣湯

又曰少陰病自利清水色純青心下必痛口乾燥者
急下之宜大承氣湯

一法用大柴胡

雍曰惟口乾燥一證見

熱更當細詳其餘證方敢用

又曰少陰病六七日腹脹不大便者急下之宜大承
氣湯

又曰少陰病脈沈者急溫之宜四逆湯

又曰少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之宜四逆湯

又曰少陰病下利脈微瀋嘔而汗出必數更衣反少者當溫其上灸之脈經云灸厥陰可五十壯常氏云可灸大衝穴雍曰仍灸太谿

問曰自利者三陰證也仲景以自利不渴者屬太陰

傷寒論卷之六
名一
渴者屬少陰何也雍曰太陰脾之經也其脈布胃中與胃爲表裏脾本惡濕加以胃中寒故不渴也少陰腎之經也腎屬水故惡燥經中有邪則腎當大燥於是引飲自救故渴也是以太陰無渴證少陰有渴證也

厥陰證六十三條

仲景曰脈尺寸俱微緩者厥陰受病也當六七日發以其脈循陰器絡於肝故煩滿而囊縮龐氏曰脈微緩者囊不縮若外證發熱惡寒似瘧爲欲愈宜桂枝

麻黃各半湯若尺寸俱沈短者囊必縮宜承氣湯下之雍曰厥陰見沈短短命脈下證未具更宜詳下證中下證全則可下

又曰三陰皆受病已入於府可下而已雍曰三陰可下三陽可汗此言其大略也陽之中自有可汗不可汗證陰之中自有可下不可下證故陰陽之中又當各詳其可汗可下而施行之

又曰厥陰之爲病消渴氣上撞心心中疼熱飢而不欲食食則吐衄下之利不止龐氏云可烏梅丸常氏

以有餘證故曰可烏梅丸四逆湯雍曰無厥證者不用四逆消渴下利飢不欲食宜理中湯下利甚者去白朮加附子氣上如奔豚者茯苓桂枝甘草大棗湯吐蚘服烏梅丸兼理中丸

又曰厥陰中風脈微浮爲欲愈不浮爲未愈

又曰厥陰病欲解時從丑至卯上

又曰厥陰病渴欲飲水者少少與之愈

又曰諸四逆厥者不可下之虛家亦然常氏曰可當歸四逆湯

又曰傷寒先厥後發熱而利者必自止見厥復利常
氏云可白頭翁湯雍曰白頭翁治熱利此當更審證
冷熱用之

又曰傷寒始發熱六日厥反九日而利凡厥利者當
不能食今反能食者恐爲除中

一云消中

食以索餅不發

熱者知胃氣尙在必愈恐暴熱來出而復去也後三
日脈之其熱續在者期之旦日夜半愈所以然者本
發熱六日厥反九日復發熱三日并前六日亦爲九
日與厥相應故期之旦日夜半愈後三日脈之而脈

數其熱不罷者此爲熱氣有愈必發癰膿也常氏曰
可服千金漏蘆湯

又曰傷寒脈遲六七日而反與黃芩湯徹其熱脈遲
爲寒今與黃芩湯復除其熱腹中應冷當不能食今
反能食此名除中必死

又曰傷寒先厥後發熱下利必自止而反汗出咽中
痛者其喉爲痺發熱無汗而利必自止若不止必便
膿血便膿血者其喉不痺常氏云喉痺可桔梗湯便
膿血可桃花湯

又曰傷寒一二日至四五日而厥者必發熱前熱者後必厥厥深者熱亦深厥微者熱亦微厥應下之而反發汗者必口傷爛赤雍曰仲景言厥應下之者謂有當下之厥而誤汗也非謂皆可下也故仲景又曰諸四逆厥者不可下然厥病至於發癰疽便膿血應下者不必拘此

又曰傷寒病厥五日熱亦五日設六日當復厥不厥者自愈厥終不過五日以熱五日故知自愈龐氏續云若六日厥者必發熱愈甚仍下利也雍曰此恐論

中語而諸書皆不見若六日厥則知陽氣有餘故知熱愈甚也

又曰凡厥者陰陽氣不相順接便爲厥厥者手足逆冷者是也龐氏曰凡厥通用四逆湯謂其脈浮遲或微或細或沈皆屬裏有寒也雍曰世之論厥者皆不達其源厥者逆也凡逆皆爲厥傷寒所論蓋手足厥逆之一證也凡陰陽正氣偏勝而厥者一寒不復可熱一熱不復可寒傷寒之厥非木陰陽偏勝暫爲毒氣所苦而然毒氣併於陰則陰盛而陽衰陰經不能

容其毒必溢於陽故爲寒厥毒氣併於陽則陽盛而陰衰陽經不能容其毒必溢於陰故爲熱厥其手足逆冷或有溫時手足雖逆冷而手足掌心必暖龐氏謂非正厥皆寒氣之輕者也故可消息汗下或者以此便爲熱厥非也熱厥之熱與寒厥之寒一也傷寒厥陰止論寒厥唯有輕重之異無熱厥也其謂寒熱相勝復五日六日之言謂發熱五日復寒厥深重者後發熱亦深重其寒厥輕微者其後發熱亦輕微此仲景論文本意誤讀者謂手足寒厥深者其內蓄熱

亦深寒厥微者其內蓄熱亦微大非也然則熱厥之證何如曰手足如炭火炮烙或如入湯中是也曰傷寒有此證乎曰雖未之見以理推之陽毒恐有此證人見之未悟其爲熱厥也曰寒熱二厥之論始於何時曰始於素問岐伯曰陽氣衰於下則爲寒厥陰氣衰於下則爲熱厥故陽氣勝則足下熱陰氣勝則從五指至膝上寒也曰經又言足如履冰時如入湯中一證豈寒熱併厥乎曰此爲風痺淫燥陰陽二經俱不足邪氣乘虛而入舍於二經之間往來寒熱正氣

不能與之爭邪氣日進正氣日衰所以不出三年死非厥也

又問曰厥病發癰膿便膿血何也雍曰毒氣隨三陰經走下不復可止非發膿癰便膿血則無自而出故其毒下於表者則發癰膿下於裏者則便膿血以是知厥亦有可下逐之理免發癰膿便膿血也便膿血則喉不痺者以毒下也應下之而反汗則口傷爛赤者以毒下而復上也曰厥陰論寒厥而此皆熱厥何也素問曰人之傷於寒者則爲病熱寒極則生熱是

爲熱厥也

龐氏曰手足厥冷皆屬厥陰不可下亦不可汗有須下證者謂手足雖厥冷或有溫時手足雖逆冷而手足掌心必暖非正厥也故可消息汗下

龐氏又曰寒熱而厥面色不澤冒昧者當用綿衣包手足令暖溫必大汗而解

龐氏曰有不因大汗下而兩手忽無脈謂之雙伏或一手無脈謂之單伏或利止如此必有正汗急用四逆輩溫之得有汗便安脈終不出者死

仲景曰傷寒脈微而厥至七八日膚冷其人躁無暫安時者此爲藏厥非虵厥也龐氏曰四逆輩冷服之常氏云可當歸四逆湯

又曰虵厥者其人當吐虵今病者靜而復時煩此爲藏寒虵上入膈故煩須臾復止得食而嘔又煩者虵聞食臭出其人當自吐虵虵厥者烏梅丸主之又主久利

又曰傷寒熱少厥微指頭寒默默不欲食煩躁數日小便利色白者此熱除也

龐氏曰宜乾薑甘草湯

欲得食其病

爲愈若厥而嘔胸脇煩滿者其後必便血雍曰熱不除而便血可犀角地黃湯

又曰病者手足厥冷言我不結胸小腹滿按之痛者此冷結在膀胱關元也龐云宜灸關元

又曰傷寒發熱四日厥反三日復熱四日厥少熱多其病當愈四日至七日熱不除者必便膿血常氏云可桃花湯

又曰傷寒厥四日熱反三日復厥五日其病爲進寒多熱少陽氣退故爲進也常氏云可四逆湯待其熱

退寒存厥不復熱始可用之雍曰寒多熱少便宜四逆湯少與之

又曰傷寒六七日脈微手足厥冷煩躁灸厥陰厥不還者死常氏云可灸太衝穴

又曰傷寒發熱下利厥逆躁不得臥者死

又曰傷寒發熱下利至甚厥不止者死

又曰傷寒六七日不利便發熱而利其人汗出不止者死有陰無陽故也雍曰汗出不止者死先服防風牡蠣湯以止汗次服甘草乾薑湯以復其陽得厥愈

足溫更作芍藥甘草湯以和之

又曰傷寒五六日不結胸腹濡脈虛復厥者不可下
此亡血下之死常氏云可當歸四逆湯四逆加入參
湯

又曰發熱而厥七日下利者爲難治常氏云四逆散
又曰傷寒脈促手足厥逆可灸之常氏云灸太衝穴
又曰傷寒脈滑而厥者裏有熱也白虎湯主之
又曰手足厥寒脈細欲絕者當歸四逆湯主之若其
人內有久寒者宜當歸四逆加吳茱萸生薑湯

又曰大汗出熱不去內拘急四肢疼又下利厥逆而惡寒者四逆湯主之

又曰大汗若大下利而厥冷者四逆湯主之

又曰病人手足厥冷脈乍緊者邪結在胸中心下滿而煩飢不能食者病在胸中當須吐之宜瓜蒂散

又曰傷寒厥而心下悸者宜先治水當服茯苓甘草湯却治其厥不爾水漬八胃必作利也雍曰治厥四逆湯

又曰傷寒六七日大下後寸脈沈而遲手足厥逆下

部脈不至咽喉不利唾膿血泄利不止者爲難治麻黃升麻湯主之雍曰服湯已脈終不至泄利不止宜服通脈四逆湯

又曰傷寒四五日腹中痛若轉氣下趨少腹者此欲自利也常氏云可四逆湯散

又曰傷寒本自寒下醫復吐下之寒格更逆吐下若食入口卽吐乾薑黃芩黃連人參湯主之雍曰竊疑此湯性寒又乾薑黃連相反若更嘔吐者當服當歸四逆加茱萸生薑湯及吳茱萸湯

又曰下利有微熱而渴脈弱者令自愈

又曰下利脈數有微熱汗出令自愈設復緊爲未解
雍曰緊爲有寒須溫之宜四逆湯

又曰下利手足厥冷無脈者灸之不溫若脈不還反
微喘者死少陰負趺陽者爲順也常氏云當灸氣海
關元二穴龐氏云凡厥通用四逆湯謂其脈浮遲或
微或細或沈皆裏有寒也

又曰下利寸脈反浮數尺中自濇者必圞膿血常氏
云可桃花湯

又曰下利清穀不可攻表汗出必脹滿雍曰宜通脈
四逆湯

又曰下利脈沈弦者下重也脈大者爲未止脈微弱
數者爲欲自止雖發熱不死

又曰下利脈沈而遲其人面少赤身有微熱下利清
穀者必鬱冒汗出而解病人必微厥所以然者其面
戴陽下虛故也雍曰不解宜通脈四逆湯少與之其
人下利清穀裏寒外熱正通脈四逆證也

又曰下利脈數而渴者令自愈設不差必圕膿血以

有熱故也常氏云可黃芩湯

又曰下利後脈絕手足厥冷晬時脈還手足溫者生脈不還者死雍曰宜通脈四逆湯

又曰傷寒下利日十餘行脈反實者死

又曰下利清穀裏寒外熱汗出而厥者通脈四逆湯主之

又曰熱利下重者白頭翁湯主之

又曰下利欲飲水者以有熱故也白頭翁湯主之

又曰下利腹脹滿身體疼痛者先溫其裏乃攻其表

溫裏宜四逆湯攻表宜桂枝湯

又曰下利譏語者有燥屎也宜小承氣湯

又曰下利後更煩按之心下濡者爲虛煩也宜梔子
豉湯

又曰嘔家有癰膿者不可治嘔膿盡自愈

又曰嘔而脈弱小便復利身有微熱見厥者難治四
逆湯主之

又曰乾嘔吐涎沫頭痛者吳茱萸湯主之

又曰嘔而發熱者小柴胡湯主之

又曰傷寒大吐大下之極虛復極汗出者以其人外氣怫鬱復與之水以發其汗因得噦所以然者胃中寒冷故也常氏云可吳茱萸湯

又曰傷寒噦而腹滿視其前後知何部不利利之則愈常氏云前部不利猪苓湯後部不利調胃承氣湯雍曰噦者胃中有寒不宜更服調胃承氣湯先宜服半夏生薑湯腹滿如故後部不利者小承氣湯微和之

龐氏曰三陽皆有合病凡十四證唯三陰無合病

仲景傷寒補亡論卷第七終